



## **PNTL: Polisiamentu iha Situasau Pandemia Covid-19**

**Mahein Nia Lian Nú. 152, 26 Fevereiru 2021**



Media PNTL JERRY/13438

*Foto: Media PNTL/2020*

**Fundasaun Mahein (FM)**  
**Website: [www.fundasaunmahein.org](http://www.fundasaunmahein.org)**  
**2021**



## Kontiudu sira

Kontiudu sira	2
Introdusaun	3
Metodolojia	3
Resposta PNTL ba situasaun pandemia Covid-19	3
Dezafiu no lisaun polisiamentu iha situasaun Covid-19	6
Rekomendasaun	7
Bibliografia	8

## Introdusaun

Iha Dezembru 2019 Governu Xina fó sai kona-bá virus foun ida ne'ebé daet daudauk iha sira nia rain no konfirma husi Organizasaun Mundial ba Saúde (OMS) no virus ne'e hanaran Covid-19. Hafoin ne'e, OMS fó sai kona-bá kestaun estratéjiku no prioridade sira hodi prevene no kontrola Covid-19. Situasaun ne'e hamosu resposta global ida hodi evita virus ne'e daet maka distansia sosial, auto karantina, *lockdown* no hapara atividade sira iha públiku hodi evita virus ne'e daet ba bebeik<sup>1</sup>.

Responde ba situasaun pandemia ne'e, Governu halo ona resposta lalais ida ho medida ezekusaun sira ne'ebé involve institusaun governmental sira, sociedade sivil sira no apoiu husi ajensia internasional sira. Resposta importante ida maka deklarar Estadu de-Emerjensia no medida ezekusaun sira desde Timor-Leste rejista kazu pozitivu Covid-19 dahuluk iha loron 21 Marsu 2020. Iha ne'ebé to'o relatóriu ne'e fó sai Timor-Leste deklarar ona Estadu de-Emerjensia ba dala-10 (sanolu) ho nia medida ezekusaun sira no possibilidade sei deklarar tan Estadu de-Emerjensia hodi hatan ba pandemia ne'e.

Hodi apoiu medida ezekusaun ba Estadu de-Emerjensia nian, papel importante ida husi institusaun seguransa sira hanesan Polísia Nasional Timor-Leste (PNTL). Iha ne'ebé apoiu sosializa regra no medida prevensaun ba Covid-19 nomos resposta sira iha âmbito atuasaun polísial nian durante pandemia Covid-19. Nune'e, relatóriu ida ne'e deskreve kona-bá resposta sira husi PNTL durante pandemia Covid-19 no nia dezafiu sira.

## Metodolojia

Relatóriu ida ne'e nu'udar rezultadu monitorizasaun Fundasaun Mahein (FM) nian desde Timor-Leste deklarar Estadu de-Emerjensia hodi responde ba pandemia Covid-19. Iha ne'ebé ligadu ho papel sira husi PNTL implementa regra no medida sira prevensaun Covid-19 nomos atuasaun polísial nian relasionadu manutensaun ba ordem públika, prevensaun krime no aplikasaun lei durante pandemia Covid-19. Prosesu ikus husi ne'e, liu husi metodu ne'ebé adopta maka *Security Sector Discussion* (SSD) ne'ebé involve peskizadór sira husi FM hodi diskute no análise ba materia relevante sira no hamosu rekomendasaun sira.

## Resposta PNTL ba situasaun pandemia Covid-19

Hafoin Ministériu Saúde fó sai kazu pozitivu Covid-19 iha loron 21 Marsu 2020, Governu hato'o kedas pedidu ba Prezidente Repúblika hodi deklarar Estadu de-Emerjensia. Hafoin hetan autorizasaun husi Parlamentu Nasional liu husi Lei N.º 1/2020, 27 Marsu no Prezidente Repúblika dekreta Estadu de-Emerjensia liu husi Dekretu Prezidente Repúblika N.º 29/2020, 27 Marsu. Nune'e atu asegura ninia ezekusaun, iha loron tuir mai Governu aprova Dekretu Governu N.º 3/2020, 28 Marsu hodi fó kbi'it legal ba Governu responde situasaun pandemia ne'e.

---

<sup>1</sup> World Health Organization, 2020.



Hodi asegura implementasaun Dekretu Governu N.º 3/2020, 28 Marsu – PNTL iha papel importante ida durante implementasaun Estadu de-Emerjensia, liu-liu implementasaun regras no medida sira prevensaun pandemia Covid-19. Portantu pandemia Covid-19 hanesan krize saúde pública ida ne'ebé bele hamosu kalamidade pública. Iha ne'ebé PNTL nia misaun defende legalidade demokratika, garante seguransa sidadaun no bens nian no proteje direitu sidadaun sira nian tuir termu sira ne'ebé estabesele iha Konstitusaun no Lei sira<sup>2</sup>.

Portantu tuir Lei N.º 2/2010 Lei Seguransa Nasional – resposta ba risku no ameasa sira tau atuasaun ida integradu iha kuadru Sistema Integradu Seguransa Nasional (SISN). Elementu esensial ida iha SISN maka PNTL. Pandemia Covid-19 hanesan ameasa ida ne'ebé bele hamosu kalamidade pública. Nune'e, funksionamentu ba SISN, iha orgaun espesializada ida ne'ebé tau matan ba koordenaun teknika no operasional ba kna'ar sira husi entidade sira forma SISN maka Sentru Integradu Jestaun ba Krize (SIJK/CIGC). Nune'e SIJK maka halo kordenasaun ba kna'ar integradu ema nian, instalasaun sira no meu seluk, atu hatan ba situasaun todan risku ka ameasa nian. Kompetênsia husi SIJK ida maka forma sira halo kordenasaun interministerial, hodi garante seguransa interna no atu hatan ba dezastre natural ka kalamidade pública sira. Nune'e, atu jere situasaun krize hanesan kalamidade pública, SIJK bele funsiona nu'udar Sala Situasaun iha kazu sira hanesan esepasaun konstitusional, tuir termu sira ne'ebé maka hakerek ona iha lejislasaun ne'ebé regula Estadu de-sítu ka Estadu de-emerjensia. Hala parte iha Direasaun no Plenáriu SIJK nian ida maka Komandante-Jeral PNTL<sup>3</sup>.

Ho kuadru legal sira ne'ebé temi liu daudauk ne'e, FM nia monitorizasaun desde deklarasaun Estadu de-Emerjensia dahuluk to'o dala-sanolu – ligadu ho PNTL nia resposta ba situasaun Covid-19. Komandu Jeral PNTL orienta Komandu Munisipiu sira implementa Estadu de-Emerjensia tuir Lei – liu-liu ligadu ho papel sira PNTL nian hodi responde ba pandemia Covid-19. Nune'e PNTL nia polisiamentu ne'ebé FM rejista durante situasaun Covid-19 hanesan tuir mai ne'e:

- 1) Sosializasaun ba regra no medida prevensaun Covid-19 ba comunidade, motorista no kondutor sira ne'ebe kondus transporte público no privadu liu husi patrullamentu regular polisial nian husi Komandu Munisipal sira, Unidade Espesial Polísia, Unidade Polísia Maritima, Unidade Patrulamentu Fronteira, Sentru Formasaun Polísia nian, Polísia Tranzitu, Oficial Polísia Suku (OPS) iha nivel nasional no munisipal sira. Nune'e mos apoiu ekipa saúde no voluntariu sira halo desinfekta ba movimentu transporte público no privadu sira nomos instalasaun público sira.
- 2) Vijilansia iha fatin kuarentena sira nomos fatin izolamentu iha kapital Dili no munisipiu sira durante oras 24 nia laran. Nune'e mos fó tulun ba ajente servisu saúde sira bainhira halo evakuasaun ba sidadaun sira ne'ebé deteta pozitivu Covid-19 ba fatin izolamentu.

<sup>2</sup> N.º 1, artigu 1 Dekretu Lei N.º 9/2009, 18 Fevereiro, Lei Orgânica Polísia Nasional Timor-Leste

<sup>3</sup> Lei N.º 2010 Lei Seguransa Nasional no Dekretu-Lei N.º 24/2020 Regulamentu Sentru Integradu Jestaun Krize.

- 3) Monta postu vijilansia iha area sira ne'ebé deteta iha movimentu ilegal iha fronteira hanesan iha Bobonaro, Covalima no Oe-cusse, no identifika sidadaun sira ne'ebé hakat ilegal iha fronteira lori ba kumpri medida sira prevensaun Covid-19 hanesan kuarentena.
- 4) Patrullamentu UPF iha fronteira hodi prevene movimentu ilegal nomos sosializasaun regra no medida sira prevensaun ba Covid-19 ba comunidade sira ne'ebe hela iha fronteira hanesan Bobonaro, Covalima no Oe-cusse.
- 5) Patrulamentu iha parte tasi-ibun sira husi Unidade Polísia Marítima hodi asegura peskador no comunidade em-jeral kumpri ba regra no medida prevensaun pandemia Covid-19.
- 6) Vijilansia iha dalan protokolu sira, nasional no munisipiu sira liu husi servisu policial nian, liu-liu movimentu sidadaun sira nian no asegura sidadaun sira kumpri ba regra no medida sira prevensaun pandemia Covid-19.
- 7) Vijilansia iha pontu entrada no saída sira hanesan aeroportu, portu no fronteira terrestre nian ba sidadaun nasional no estranjeiru sira ne'ebé tama-sai iha teritoriu nasional.
- 8) Vijilansia ka fó seguransa ba oficial Governu nian durante distribui sasan sexta bázika no tulun sira seluk ba comunidade sira iha nivel nasional to'o iha comunidade sira hela iha area remotas.
- 9) Iha Kapital Dili, PNTL liu husi Sentru Formasaun Polísia (CFP) halo mos karidade ba kbi'it laek sira durante Estadu de-Emerjensia. Maneira identifika apoiu ba kbi'i laek sira liu husi patrullamentu PNTL nian identifika ema sira ne'ebé presiza tulun.
- 10) Ekipa Médiku Komandu Jeral PNTL halo sensibilizasaun kona-bá Covid-19 ba membru PNTL sira nomos ba Unidade Patrullamentu Fronteira, Unidade Polísia Marítima no Servisu Migrasaun.

PNTL nia polisiamentu durante pandemia Covid-19 (iha ezekusaun ba Estadu de-Emerjensia dahuluk to'o ba dala-sanolu) – PNTL mos halo avaliasaun bebeik ligadu medida sira ne'ebé halo ona no dezafiu sira iha terenu liu husi enkontru sira iha nivel Komandu Jeral PNTL nian. Objetivu husi avaliasaun ne'e hodi haree fila-fali resposta sira PNTL nian durante Estadu de-Emerjensia nune'e atu haforsa no hadi'a diak liu tan. Nune'e mos dezempeñu PNTL nian liu-liu disiplina, ierarkia, kadeia komandu no rekursu umanu<sup>4</sup>.

Aleinde misaun espesifiku sira resposta ba pandemia Covid-19, PNTL mos kontinua mantein misaun no kompetênsia sira ne'ebé atribui ba PNTL tuir Lei Organika PNTL nian. Iha ne'ebé estratéjia no aproximasaun sira kontinua kaer metin ba filozofia PNTL nian, polísia komunitaria, ho doutrina VIP (vizibilidade, involvimentu no profesionalismu) iha asaun sira policial nian iha âmbito manutensaun, ordem no tranquilidade pública.

Ezemplu ida, FM nia monitorizasaun durante situasaun pandemia Covid-19 iha Munisipiu Dili, PNTL kontinua funsiona reuniaun Konsellu Seguransa Munisipal (KSM) no Konsellu

---

<sup>4</sup> Komunikadu Imprensa PNTL. Loron 21 Janeiru 2021. Disponivel iha ne'e: <https://www.pntl.tl/enkontru-avaliasaun-implementasaun-ee-no-analiza-resumu-lei-nu-72020/>



Polisiamentu Komunitaria (KPK) hodi responde ba preokupasaun sira komidade nian, liu-liu risku sira ba konfliktu<sup>5</sup>. Nune'e mos OPS sira vizibel iha suku no dalan públiku sira.

## **Dezafiu no lisaun polisiamentu iha situasaun Covid-19**

Polisiamentu iha situasaun pandemia Covid-19 hasoru dezafiu konkreta nu'udar ajente implementador Lei no Ordem. Portantu PNTL dezempeña funsaun dupla, funsaun prinsipal polísial nian nomos tarefa adisional sira iha âmbito prevene propagasaun surtu Covid-19.

Artigu 2 Dekretu Lei N.º 9/2009, 18 Feveiru, Lei Orgânica Polísia Nasional Timor-Leste hatete PNTL nia misaun defende legalidade demokratika, garante seguransa sidadaun no bens nian no proteje direitu sidadaun sira nian. Iha situasaun pandemia ida ne'e, ejije mos PNTL dezempeñu funsaun sira relasionadu manutensaun ordem no tranquilidade pública nu'udar konsekuensia husi pandemia Covid-19, hanesan: aplikasaun regra no medida sira prevensaun pandemia Covid-19 iha komidade.

Aleinde pandemia ne'e obriga komidade sira tenke adapta tuir realidade foun ida ho limitasaun oin-oin iha aspetu sosiu-ekonomiku. Nune'e mos PNTL tenke ajusta mos pratika polisiamentu hodi asegura implementasaun regra no medida sira prevensaun Covid-19. Ida ne'e hanesan pontu kritiku PNTL nia polisiamentu, hanesan mos akontese iha Nasaun hotu-hotu hasoru propagasaun pandemia Covid-19.

Situasaun sira nune'e, presiza polítika seguransa ida ne'ebé ligadu ho tarefa sira PNTL nian ne'ebé la'os deit haree ba funsaun sira polísial nian (ne'ebé atribui husi Lei Organika PNTL 2009). Maibe mos realidade foun seluk hanesan ameasa ba saúde pública (Covid-19), presiza mos ajusta tarefas sira polisiamentu PNTL nian. Portantu situasaun atual PNTL nian, sei falta polítika ida ne'ebé bele orienta ninia desenvolvimentu – iha tempu hanesan menus ba infraestrutura, lojística no rekursu umanu. Hanesan iha fronteira ne'ebé sai hanesan area kritiku ba movimentu ilegal sira (kazu Covid-19 maioria importadu) no kontribui mos husi movimentu ilegal sira. Iha ne'ebé menus postu vijilansia sira iha fronteira Bobonaro, Covalima no Oe-cusse nomos menus ba lojística.

Situasaun pandemia Covid-19 – PNTL hanesan ajente *frontline* socializa regra no medida prevensaun ba Covid-19 ba komidade maibe membru PNTL sira ne'ebé servisu terenu sei falta ba meius sira prevensaun nian. Ezemplu, uza maskra, ekipamentu protesaun pesoal no distansia sosial. Realidade membru PNTL sira falta ekipamentu sira ne'e (ezemplu evakuasaun ba ema ida ne'ebé pozitivu Covid-19 iha fatin karantina Dili no ema ne'e rejeita, membru PNTL ne'ebé fó apoiu ba ekipa saúde nian halo atuaun direita iha kazu ne'e la uza ekipamentu protesaun)<sup>6</sup>. Maske iha risku boot ba membru PNTL sira

<sup>5</sup> Komandu PNTL realiza enkontru KSM. Loron 19 Outubro 2020. Disponivel iha ne'e: <https://www.pntl.tl/komandu-pntl-realiza-enkontru-ksm/>

<sup>6</sup> Relatório Monitorizasaun RDDU periodu 22 Abril 2020, disponivel iha ne'e: <http://laohamutuk.org/Justice/2020/RDDURelObsEE22Abr2020te.pdf>. Nomos Relatório Monitorizasaun RDDU Periodu 28 Abril – 27 Maiu 2020. Disponivel iha ne'e: <http://laohamutuk.org/Justice/2020/RDDU-EEII28May2020te.pdf>



maibe ida ne'e maka dezafiu ne'ebé PNTL hasoru iha nia polisiamentu durante situasaun pandemia Covid-19.

Iha lidun seluk kona-bá medida polisial nian durante situasaun pandemia Covid-19, relasionadu uza forsa la tuir prosedementu uzu nian. Hanesan mos Provedoria Direitus Humanus no Justisa (PDHJ) no Rede Defensor Direitus Umanus (RDDU) sita iha sira nia relatóriu durante Estadu de-Emerjensia kona-bá PNTL nia atuasaun. Iha ne'ebé atuasaun balu identifika kona-bá violasaun direitus umanus husi membru PNTL<sup>7</sup>.

Maibe pratika polisiamentu no hanesan mos lisaun sira durante Estadu de-Emerjensia, PNTL nia asaun polisial haktuir daudauk filozofia polísia komunitaria no doutrina VIP. FM enkora PNTL kontinua promove aproximasaun sira nune'e iha PNTL nia polisiamentu ne'ebé la haree ba OPS ka departamentu espesifiku ruma. Maibe membru PNTL tomak tenke kontinua implementa estratéjia no aproximasaun polisiamentu komunitaria duke uza forsa ne'ebé la nesesariu.

Haree ba realidade atual, número kazu pozitivu Covid-19 kontinua aumenta (110) no iha ona transmisaun lokal (kazu 7 husi total kazu 110) no possibilidade sei renova tan Estadu de-Emerjensia. FM enkora PNTL aprende husi nia hahalok rasik tantu naksalak sira nomos pratika polisiamentu (polisiamentu komunitaria – VIP) ne'ebé fó susesu boot ba PNTL nia servisu durante situasaun pandemia Covid-19 (Estadu de-Emerjensia ba dahuluk to'o sanolu). Iha ne'ebé polisiamentu ida ne'ebé besik ho komidade no kontinua promove parseiru mutua entre polísia ho komidade ne'ebé existe tiha ona no enkoroza involvimentu komidade nian iha asaun sira polisial nian.

## **Rekomendasaun**

Maske seidauk perfeitu maibe resposta membru sira PNTL nian durante situasaun pandemia Covid-19 hatudu sinal pozitivu. PNTL nia polisiamentu durante periodu ne'e mos promove daudauk dialogu (polisiamentu komunitaria) duke resposta sira ne'ebé la nesesariu (uza forsa ne'ebé la nesesariu).

Nune'e FM rekomenda PNTL kontinua promove polisiamentu ne'ebé besik ho komidade (polisiamentu komunitaria ho doutrina VIP) no ajusta tuir realidade foun iha pratika polisiamentu iha situasaun pandemia Covid-19.

---

<sup>7</sup> Relatóriu Monitorizasaun PDHJ Durante Estadu de-Emerjensia ba 1 to'o 9 (Periodu 28 Marsu 2020 to'o 1 Feveiru 2021). Disponivel iha ne'e: <https://pdhj.tl/media-publications/relatoriu-no-publikasaun-sira-seluk/>. Nomos Relatóriu Monitorizasaun RDDU Periodu 28 Abril – 27 Maiu 2020. Disponivel iha ne'e: <http://laohamutuk.org/Justice/2020/RDDU-EEII28May2020te.pdf>

## Bibliografia

Decreto do Governo N.º 3 /2021 de 29 de Janeiro Medidas de execução da declaração do estado de emergência efetuada pelo Decreto do Presidente da República N.º 6/2021, de 27 de janeiro

Decreto do Presidente da República N.º 58 /2020 de 3 de setembro .

Decreto do Presidente da República N.º 35 /2020 de 27 de maio

Decreto do Presidente da República N.º 32 /2020 de 27 de abril

DECRETO DO PRESIDENTE DA REPÚBLICA N.º 29/2020 de 27 de março

Dekretu-Lei N.º 24/2020 Reglamentu Sentru Integradu Jestaun Krize

Dekretu Lei N.º 9/2009, 18 Fevereiro, Lei Orgânica Polísia Nasional Timor-Leste

Komunikadu Imprensa PNTL. Loron 21 Janeiro 2021. Disponível iha ne'e:

<https://www.pntl.tl/enkontru-avaliasaun-implementasaun-ee-no-analiza-resumu-lei-nu-72020/>

Komandu PNTL realiza enkontru KSM. Loron 19 Outubro 2020. Disponível iha ne'e:

<https://www.pntl.tl/komandu-pntl-realiza-enkontru-ksm/>

Lei N.º 8 /2020 de 3 de Setembro Autorização da Renovação da Declaração do Estado de Emergência

Lei N.º 6 /2020 de 12 de Agosto Confirmação da Declaração do Estado de Emergência

Lei N.º 4/ 2020 de 27 de Maio Autorização da Renovação da Declaração do Estado de Emergência

Lei N.º 3 /2020 de 27 de Abril Autorização da Renovação da Declaração do Estado de Emergência

LEI N.º 1/2020 de 27 de março AUTORIZAÇÃO DA DECLARAÇÃO DO ESTADO DE EMERGÊNCIA

Lei N.º 2010 Lei Seguransa Nasional

Lei N.o 3/2008 de 22 de Fevereiro, Regime do Estado de Sitio e Estado de Emergência

Monitorizasaun RDDU Periodu 28 Abril – 27 Maiu 2020. Disponível iha ne'e:

<http://laohamutuk.org/Justice/2020/RDDU-EEII28May2020te.pdf>

Relatóriu Monitorizasaun PDHJ Durante Estadu de-Emerjensia ba 1 to'o 9 (Periodu 28 Marsu 2020 to'o 1 Fevereiro 2021). Disponível iha ne'e: <https://pdhj.tl/media-publications/relatoriu-no-publikasaun-sira-seluk/>

Relatóriu Monitorizasaun RDDU periodu 22 Abril 2020, disponível iha ne'e:

<http://laohamutuk.org/Justice/2020/RDDURelObsEE22Abr2020te.pdf>.